

In chat sensaziunal

Il servetsch archeologic dal Grischun fa in chat impurtant

■ **(anr/pap) Dapi la primavaira fa il servetsch archeologic dal Grischun (SAG) exchavaziuns sistematicas sin il complex fortifitgà Munt Son Gion a Seglias. Latiers han ins manà a glisch in battisteri dal temp medieval tempriv.** Il Munt Son Gion era abità gia ditg avant ch'ils Romans han conquistà il Grischun. Restanzas dal temp da bronz e dal temp da fier èn perdidas ch'umans da quel temp han passentà lur mintgadi sin il plaun dal Munt Son Gion a l'entrada da la Viamala. Pli tard han alura ils Romans fabritgà ina tur da guardia sin quel grugn d'in'auta valur strategica. La tur dals Romans è suenter vegnida circumdada d'in mir che ha transfurmà il Munt Son Gion pli probabel en in refugium per la populaziun da la vallada. 1999 è vegnì scuvrì tar exchavaziuns in battisteri dal temp cristian tempriv che è ussa vegnì deliberà dal tut da la mischiera, sut la quala el giascheva lungs onns. La construcziun ch'era dal tutfatg nunenconuschenta fin uss era vegnida construida il tschintgavel fin il sisavel tschientaner suenter Cristus. Ella è tenor *Urs Clavadetscher*, archeolog chantunal, in dals pli vegls edifizis sacrali in il chantun Grischun e perquai ina pitschna sensaziun.

Mantegnì grazia al militar

Bain mantegnì e visibel uss è il battisteri central (piscina) en furma d'in octagonal culà en il fons da maula. Circumdà è quest battisteri da mirs da fin dus meters autezza cun restanzas da liadira, era els per part bain mantegnids. En l'ost èn ils mirs vegnids complettads d'ina pitschna ap-

sida mez radunda. «Che quest battisteri è donnegià ed a medem temp mantegnì anc uschè bain avain nus d'engraziar al militar. Durant l'emprima guerra mundiala era tut il territori dal Munt Son Gion requirì da l'armada svizra che ha gè si qua ina posiziun per survegliar la Tumleasta. Al lieu dal battisteri han ils schuldads pli probabel provà d'installar in chanun. Cur ch'els èn rivads sin il spelm han els tschertgà in auter lieu ed han uschia bain ruinà ina part dal mir ma na il battisteri octagonal che giascha per cletg sin quel spelm», ha declarà il tecnicist d'exchavaziuns *Manuel Janosa*.

Fin tar la schanuglia en l'aua

«Battisteris cumparegliabels dal temp medieval tempriv na datti detg savens en il sid. En il nord èn els quasi nunenconuschents. En Grischun datti in en la claustra da Mustér ed in auter è a Schaan en il Principadi da Liechtenstein», ha puntuà *Sebastian Gairhos*, collavuratur scientific dal SAG. Ch'els dateschian d'in temp en il qual vegnivan battegiadas per gronda part persunas creschidas. Tenor Gairhos n'avevan persunas na battegiadas nagin access al cult divin en baselgia. Perquai eran ils battisteris construids davant las baselgias, uschia che la persuna battegiada ha pudì entrar tras ina porta dal battisteri direct en baselgia. En la cerimonia gievan quellas en l'aua da la piscina fin tar la schanuglia ed il sacerdot – da quel temp l'investg persunalmain – laschava cular aua sur ellas. Pir a partir da l'otgavel tschientaner è vegnì introducì il ritual usità oz ed applitgà en emprima lingua per uffants.

Fitg vegl complex fortifitgà

Il resultat da las exchavaziuns bittan ussa ina nova glisch sin l'istorgia dal complex fortifitgà Munt Son Gion. Uss èsi da considerar el sco ins dal complex fortifitgads ils pli vegls da la Svizra cun diever nuninterrut da milli onns, numnadamain dal 5avel/6avel fin il 15avel tschientaner. Direct sper il battisteri ha il SAG chattà anc ina fossa d'in uffant da var otg fin diesch onns. Janosa spera ussa ch'ins chattia cun las proximas exchavaziuns en il vest dal battisteri anc dapli fossas ed auters indizis impurtants da quel temp.

Sin tschertga da raps

Il territori dal Munt Son Gion sez è en possess privat e vegn tgirà dapi il 1973 sistematicamain da la Familienstiftung Hohen Rätien, sustegnida dal chantun e da la confederaziun, dal Förderverein Burg Hohen Rätien e da diversas persunas singulas. «Quest chat dal battisteri è per nus – e per tut il complex – d'ina vart ina scuverta fitg impurtanta, da l'autra vart però er ina chargia perquai che nus n'avain betg ils raps per pudair preservar el ch'el na giaia betg en muschna. Nus duvrain sustegn finanziàl da bleras varts, ils custs per tetgs ed indrizs cunter plievgia e naiv surpassan nossas capacitads finanziàlas. Il chantun e la confederaziun han mess en vista da sorprendender tranter 40 e 60 pertschient da quels custs, ma i mancan alura anc adina almain 40 pertschient e quai è radund 350 000 francs. Mintgin che vul gidar è fitg bainvis e survegn infurmaziuns sut www.hohenraetien.ch, ha puntuà *Ruedi Jecklin* da la Familienstiftung Hohen Rätien.



Il battisteri octagonal ch'è vegnì fatg liber durant ils mais passads tutga tar in complex sacral dal temp medieval tempriv. El era fabritgà attatg ad ina baselgia ch'è anc oz la baselgia dal Munt Son Gion.